

Home » Pronto ta ordena Michael Nicolas: Tarea di un sacerdote ta pa trece pueblo bek rib'e caminda di berdad

PRONTO TA ORDENA MICHAEL NICOLAS: TAREA DI UN SACERDOTE TA PA TRECE PUEBLO BEK RIB'E CAMINDA DI BERDAD

September 12, 2025

Den e mesun luna cu lo bay celebra e parti historico di Kapel di Alto Vista, riba e mesun luna aki Aruba lo ricibi un regalo di un yiu di tera cu a ofrese su mes pa sirbi su pais.

“P’ami e ta un milager. Te ainda mi ta bisa e ta un milager. Un persona casa pa 51 aña, a perde su casa, tata di tres yiu, abuelo di seis nieto, y awor ta bay wordo ordena pa bida Pader di un pueblo”, Nicolas ta expresa. For di su hubentud na edad di 16 aña el a haya su prome yamada, pero bida tabata tin algo otro p’e. E ta contento cu e por a pasa door di experiencia di bida como casa, tata, y abuelo – pasobra awor e ta un sacerdote cu por papia kico di berdad ta un famia. Un famia no ta co’i loco, un famia ta un instituto – si bo no por maneha un famia, ta kico otro bo por pretende di por maneha.

Nicolas ta bay keda ordena como sacerdote oficialmente anto e parti mas bunita ta, cu riba 7 di october, celebracion di Virgen di Santo Rosario di Alto Vista, ta hiba e Diacono, Michael Nicolas bek 53 aña pasa cu el a casa na 1972. “P’esey mi amor pa La Virgen Maria ta grandi”, Nicolas ta expresa.



Tur esaki ta muestra pa pueblo caminda nos no ta nos so. Hopi biaha nos caminda ta musta hopi dificil, hopi cos fastioso ta pasa den bida. Pero ora cu cierto cosnan toca bo mes, bo ta bisa ‘señor, bo ta grandi.’

Pa bo ta un sacerdote, e prome cos cu ta pidi ta entrega. No ta un cos cu bo ta scoge den buki ta kico lo bo tin gana di bira, e mester ta algo di entrega. "Pasobra un sacerdote ta pidi pa haci tres cos den su bida, duna enseñansa, siña su pueblo kico ta fe, e tin responsabilidad pa santifica su pueblo door di e sacramento, anto e ultimo tarea ta duna guia – alerta y compañía su pueblo, trata di trece pueblo bek rib'e caminda di berdad", segun Nicolas.

Esaki mester ta un estimulacion pa henter pueblo pa nunca laga bo vocacion pasa bay. "Esey mi ta spera cu ta bira cu señor ta laga esaki bira mi contribucion pa e par di añanan cu e lo regala mi di bida, cu mi por ofrece na nos pueblo di Aruba e bunitesa di kico ta un famia, no saliendo for di conocimiento teoretico so pero for di loke ami por a biba como tata, abuelo, y viudo", Nicolas ta bisa.



Rev. Pastoor Morrison Laporte, delegado di nos Administrador Apostolico ta bisa cu Nicolas tin un trayecto di informacion tremendo, un experiencia masha grandi mes den hopi cos cu el a pasa den su bida. El a ricibi su preparacion como Diacono Permanente hunto cu algun otro persona cu tambe ta Diacono Permanente na Aruba, pero tambe na Corsou y Boneiro.

"Despues cu el a bira Diacono, el a sigui prepara su mes, el a sigui conscientisa su mes y profundisa su mes riba e sacramentonan, y riba iglesia. Riba e aspecto spiritual el a ricibi diferente formacion cual ta importante pa para keto na Aruba, na Corsou el a ricibi y tambe na Trinidad", segun

Laporte. E yunan y famia ta di acuerdo cu su ordenacion, cual segun iglesia mester aproba su ordenacion sacerdotal.

Riba diadomingo 26 di october e portanan di Pro Catedral ta habri pa ricibi tur hende, tin luga pa tur. No keda sin bini, bin cu e yunan, nieto, tur hende.



Fuente: https://24ora.com/pronto-ta-ordena-michael-nicolas-tarea-di-un-sacerdote-ta-pa-trece-pueblo-bek-ribe-caminda-di-berdad/?utm_source=dlvr.it&utm_medium=facebook&fbclid=IwY2xjawM1CVNleHRuA2FlbQlXMQABHhP0rixHZaQi7USuM6aaw5U8ifyXMJrkJVnPwfBhTBCh0btgQjKk1aBPvhsB_aem_O86JjnOeFkP2WCjcQfftJA